

14. oktober 2025

UKA2025/87 aamma 93

Utoqqaat pillugit siunnersuisooqatigiinnik kommunit tamarmik kingusinnerpaamik ukiakkut ataatsimiinnermi 2027-mi peqalernissaannut Naalakkersuisut inatsimmik siunnersuuteqarnissaannut peqqunneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Jens Nap̃tôK' Naleraq)

Utoqqarnut inatsimmik ataatsimik pilersitsisoqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Mariane Paviassen Jensen, Inuit Ataqtigiiit)

Siullermik siunnersuuteqartut siunnersuutaanut pingaaruteqartunut Siumumiit qujassuteqarfigerusuppavut. Siunnersuutit utoqqaat pillugit politikimik erseqqissaanissamut siuarsaanissamut peqataatitsinerunissamullu tunngapput. Inuiaqatigiit utoqqarnik peqateqaratik ingerlasinnaangillat, taamaattumik pingaaruteqarpoq utoqqaat misilittagaannik, pisinnaatitaaffiinik pisariaqartitaannillu ataqqinninneq takutissallugu, toqqissisimaneq kiisalu sunniuteqartumik peqataaffeqarsinnaanissaat qulakkeerluguttaaq. Siunnersuutit marluk ataatsikkut ullumi sammisavut, assigiinngiaartunik utoqqarnut tunngatillugu periarfissanik pitsanngorsaannissanik imaqarput, Siumullu taakku tamaasa tapersersorpai.

Siullermik siunnersuut kommunini tamani Utoqqaat Siunnersuisooqatigiinnik pilersitsinissamut tunngasoq pillugu (Jens Nap̃tôK' Naleraq).

Siumut tapersersuivoq kommunini tamani inatsisitigut Utoqqaat Siunnersuisooqatigiinnik pilersitsinissamut siunnersuummut.

Isumaqarpugut utoqqaat inuiaqatigiinni aalajangiinnermut peqataatinneqartarnissaat pingaaruteqartoq. Utoqqaat siunnersuisooqatigiivi aqqutigalugit utoqqaat ilisimasatik misilittagaatillu tunngavigalugit atugarissaanissamut, peqqissutsimut, ineqarnermut pilersaarusiornernullu aalajangiinnermut pingaaruteqartunik isummersueqataallutik tunniussaqaarsinnaapput.



Siumut isumaqarpoq utoqqaat siunnersuisoqatigiit pilersinneqarnerat kommunit aamma utoqqaat pillugu oqaaseqartartoq – minnerunngitsumillu pineqartut – suleqatigiillutik pilersittariaqaraat, taamaalilluni aqqissuussinerit ingerlatsinerillu ataqatigiissillugit pisariaqartitallu tunngavigalugit ingerlaqqissinnaanngorlugit.

Aappaattut siunnersuut utoqqarnut inatsisip ataatsip suliarineqarnissaanut tunngasoq pillugu (Mariane Paviassen Jensen).

Siunnersuummut tassunga Siumut aamma tapersersuivoq, taamaalilluta utoqqarnut inatsit ataasiusoq pilersinneqarsinnaassammat.

Isumaqarpugut taamaaliornikkut utoqqarnut paasissutissat erseqqinnerusut, naligiissitsinermik pissuseqarnek kiisalu nalorninaatsumik pisinnaatitaaffinnik qulakkeerinninneq qulakkeerneqarsinnaasoq. Ullumikkut inatsisit utoqqarnut tunngassuteqartut inatsisinut assigiinngitsunut immikkoortillugit sinaakkusersugaapput, taamaalillunilu paasiuminaatsuusinnaallutik assigiinngisitsisumillu ingerlatsinissamut qaninnerulersitsisinnaallutik.

Inatsit ataatsimoortitsisoq pilersissallugu sulinissaq assut orniginarpoq, aamma maani Inatsisartuni pisariillisaanissamut oqallittarnitsinnut siunnersuuteqartup siunertaa tulluartaavoq. Utoqqaat pisinnaatitaaffii pillugit nalorninaannerusumik inississinnaaneq taamak iliorntsigtut aqutissiuussinnaagipputtaaq Siumup qularutigingilaa.

Siumup pingaartippaa inatsisissamik suliaqarnermi utoqqaat peqatigiiffii, kommunit, utoqqaat pillugit oqaaseqartartoq sulisullu akornanni peqataatitsinikkut piareersaasiortoqassasoq, taamaalilluni inatsisissaq pineqartut atugaanut periarfissaanullu naapertuuttunngortinneqarsinnaassammat.

Naalakkersuisut akissutaat pillugu

Siunnersuutitut Naalakkersuisut akissutaanut tunngatillugu, siunnersuutigineqartut pillugit Naalakkersuisut akuersaarnartitsillutik akissuteqarput.

Taamaattoq pingaarpoq sulineq taamaallaat allaffissornikkut ingerlanneqassanngitsoq, Siumumimi pingaartipparput utoqqaat ataatsimoortumik inatsisiliunneqarnissaat aamma inatsisitigut illersugaasumik kommunini siunnersuisooqateqalernissaat, suleqatigineqartussat taakkartoriikkavut peqatigalugit.

Pisariaqartutut isigaarput inatsisiliornermi siunnersuisooqatigiissat inatsimmi ilanngunneqarnissaat – taamaallaat Naalakkersuisut akissutaanni “periarfissap misissorneqarnissaanik” allaannarani.

Ilanngullugu pingaartipparput, inatsisiliarisassat sapinngisamik piaartumik piareersarneqalissasut, taamaalilluta apeqqutit utoqqarnut tunngassuteqartut aatsaat 2027-imi ukiakkut eqqartoqqinneqarnissaat pinnagu.



Siumut siunnersuutit marluusut tapersersorpai, aamma Ilaqutariinnermut Peqqissutsimullu Ataatsimiititaliami sukumiisumik suliarineqaqqullugit innersuupparput.

Siunnersuutit taakku marluusut ataatsimut isigissagaanni inuiaqatigiinni siunissami utoqqarnut politikip nukittorsarnissaanut ilaaqataasussaapput.

Erik Jensen

Siumut